

Memorie bie , 't aafsied van Awt Prins en senator Bert Leurs,

30 jannewarie 2012

't is wie 't is en 't kump wie 't kump. Tweë artikele oet 't Kölsche Grundgesetz die perfek passe bie de meneer wo-op Bert in 't laeve sjtóng. Hae henjelde nao de rejeliteit en waar neet bang veur wat de toekoms zou brènge.



Gaer wil ich 'n aantal van dees artikele gebroeke in mien memorie.

Vastelaovend 1982, Bert woord oetgerope es Prins van de toenmalige Pierewieters. Hae waar miene eëste Prins es Vors van de vastelaovesvereniging. Es jónk menke van 19 jaor profileerde hae zich zoa wie 'nne prins dat heuërt te doen.

Nao zien prinsejaor woord Bert lid van de Raod van 11. Dao bleek al gaw dat v'r 'nne goje hawwe bènnegehaold. Heël betrokke en veural neet bang óm de henj oet de moewe te sjtaeke.

Wat weg is, is weg: Soms ginge dènger neet zoa-esse mótte gaon. Bert waar d'r de man neet haer óm dao euver te jeëmere, want hae heel zich vas aan, **Niks blif wie 't waar:** Esse wier wils kómme mósse auch aope sjtaon veur vernujinge. Mer waal krieties blieve, want tradiesies zeen d'r óm te behawte, dus es de verangeringe volges Bert die tradiesies geweld aandege hanteerde hae 't zösde artikel: **kèn ich neet, hób ich neet neuëdig, weg d'rmit.**

't Waar dan auch neet vraem dat hae 'n plaats kreeg in 't besjtuur van de vastelaovesvereniging es sikretaris. Alles woord sekuur opgesjreve en bewaard en es emes get vergaete waar, dan wis 'r altied waal 't versjlaag te vènje wo de aafspraak besjreve sjtóng.

Sieferkes, dao hawwer auch get mit. Wie v'r op einig mement zónger penningmeister kaome te zitte, waol hae die taak waal op zich numme. 't Waar 'n geròs geveul, weer hawwe weer emes dae oppe sente zaot.

'n Hoagtepuntj waar 't 5x11 jaorig besjtaon; ein geweldig feës wo dudelik 'nne sjtempel van Bert op sjtóng: de keuze van de artieste mer zeker auch de fassilitaere verzörging. Depe indrök haet dat gemaak, in Bor en auch dao boete. Mit dat feës ging 'n groate wunsj van Bert (en neet allein van häöm) in vervölling: de Pierewieters woorte Bessemebènjers.

De lèste jaore haet'r 'n sjtepke trök mòtte doen. Zien baan bie Albron gekombineerd mit 't beheëre van 't gemeinsjapshoes same mit Bep, vroeg waal heël vää van ziene tied en innerzjie en dus trooj hae in 2009 trök es lid van de Raod van 11. En dat deeg 'm bes waal pien.

Ómdat veer same al 'ns dèkker naogedach hawwe euver wie v'r aaftraejende luuj veur de vereniging kooste behawte, woord Bert veurig jaor geïnsjtalleerd es eëste senator van De Bessemebènjers.

Zoa hawwe v'r 'm toch weer trök!

Hae kreeg weer 'n eige möts: 't envelöpke, dat v'r same in Koblenz zeen gaon oetzeuke. Zoa heuërde hae weer heëlemaol d'rbie.

Drunkse eine mit?: Ich gluif dat 't zien liefsjpreuk waor die hae waarsjienlik 't leefste baove 't befèt van 't gemeinsjapshoes haw gehange, waor 't neet dat dan d'n inhawt van de kas allein mer door häöm gevöld zou waere. Zien gasvrieheid seerde häöm 't allermeiste.

't Haet nog ummer good gegange: Wie d'r in meërt aafgeloupe jaor krank woord, waor dat in zien auge mer tiedelik. "Ich weit wo ich 't veur door", zag 'r en mit 'n óngelukkig optimisme ging hae de sjtried aan. Wie 'r 15 jannewarie oet henj van Prinsepaar Jack en Willeke en veurzitter Piet Leurs de pin van dit jaor kreeg opgesjtaoke, sjtèlde hae dat nog erg op pries. Auch toen waor hae nog heël positief en sjprook 'r zónger taboes euver zien ziekte en genaezingsproces. Nemes koos vermoede dat hae bènne tweë waeke d'r neet meër zou zeen.

Bert, Maach 't jot en dooch ózze leven Heër de groete.

Diene Groatvors Wil